

## Pablo Efeso Anoafo Kirika Kenexô Fomani

### *Pablo ato yoisharani, Efeso anoafo*

<sup>1</sup> Ēkĩa Pablo ẽ mato kirika kenexô fomai. Ea Jesucristo nĩchia ẽ aõxõ ãfe meka yoimis inõ, Niospa fichipaiyai keskafakĩ. Ẽ na kirika mato fomai a Nios Ifofaafo, Jesucristo chanĩmara faafo, Efeso anoafo. <sup>2</sup> Nõko Epa Nios feta nõko Ifo Jesucristo mato shinãsharanõ mato noikĩ mãto shinã mẽra mato shinãmasharanõ, mãto õiti fekaxtenõma.

### *Nõ Cristo chanĩmara faito afara sharafo noko amatiro*

<sup>3</sup> Nõko Ifo Jesucristo ãfe Apa Niospa noko afara sharafo noko shara famai, nai mẽraxõ nõ õiamafiaito nõko õiti mẽra noko inimamasharai nõmãĩ ãfe fakefokẽ. Nãskakẽ nõ yoisharai nõ inimasharakõĩ Epa Nioski. <sup>4</sup> Epa Niospa mai yafi nai onifayoxoma noko katonĩ nõ afe ĩpaxanõ ãfe Fake Cristo keskara afaa chakafamisma keskara sharakõĩ nõ inõ. Niospa noko noikĩ, <sup>5</sup> ãfe fakefo noko fani. Anori shinãni Niospa a Jesucristo noko nãxoyoxiai. <sup>6</sup> Nãskakẽ Niospa ãfe Fake noikõikĩ nokori nãskarifai noikĩ. Nãskaxõ noko nimasharapakenaka. Nãskakẽ Nios sharafinakõikẽ nõ aicho fai akiki inimakĩ nokomãĩ afama mĩshti sharafo famaito Jesúsxõ. <sup>7</sup> Niospa noko noikĩ finakõikĩ ãfe Fake Jesús noko nãmã nĩchixonĩ nokoõnoax ãfe imi foax ifi cruz ikakinoax noko nãxonõ nõ sharakõĩ afe inõ, askatari nõko chaka nokoõnoa noko soxonõ. <sup>8</sup> Nãskaxõ

Niospa noko õimana noko noisharakõikĩ noko tãpimasharakõikĩ, askatari noko shinãmakĩ finakõi. <sup>9-10</sup> Nãskakẽ Epa Niospa yoini afama mĩshti onifayoxoma ãfe Fake xanĩfo imaxikĩ, keyokõi, nai mẽranoafoya, nãmãnoafoyari ãto xanĩfo finakõi inõ. Tsoa pishta anori meka nikayomisma Niospa onãxõ yoini a shinãi keskafakĩ, anori noko tãpimani nõ tãpisharanõ aõxõ. Nãskakẽ Niospa ãa shinãkĩ iskafani: “Nã ãfe Fake ã nĩchipaiyaitĩa ã nãmã nĩchixii keyokõi nai mẽranoafoya, nãmãnoafori ãto xanĩfokõi inõ,” ixõ Niospa shinãni. Nãskaxõ nãnori iskaratĩa noko tãpimana.

<sup>11</sup> Nõfi Cristo fakekõifokĩ. Nõ afe yorakõifo ikaito, Epa Niospa noko katoni noko onifayoxoma ãa shinãkĩ taefani. Epa Niospa nonori iskafakĩ shinãni: “Na ãfe Fake Jesús ã inãi keskari fakĩ nã ãfe Fake Jesús Ifofaifori ã ato inãira,” ixõ Epa Niospa shinãni. A Niospa shinãkĩ yoini keskara, nãskarifikĩ iskaratĩa mã askafaa. <sup>12</sup> Akka nõ Cristo Ifofakĩ taefaxõ nõ yoikĩ iskafanõ: “Epa Niosi, mĩ fãsi sharakõi. Mĩ noko sharafamis keskara sharakõi. Tsoa fetsakai mia keskara sharama,” ixõ nõ yoinõ.

<sup>13-14</sup> Nãskakẽ ã mato yoi mãkai judeofoma. Nãskafixõ Niospa meka shara Jesúsxõ mã nikakĩ mãri chanĩmara fai. Mã askaito Niospa mato chaka soaxona mã afe nipaxanõ. Nãskakẽ mãri iskaratĩa Cristo afe yorafokĩ. Anori Niospa yoikĩ taefani keskafakĩ, ãfe Yõshi Shara nõ mẽra nanea noko ĩkinõ. Noko askafaito nõ tãpitiro ãfe shara noko inãxii. Nãskaxfi nõ Niosnoafoki. Nãskakẽ nõ tãpiama afetĩara nai mẽra noko ifi. Taekõifakĩ anori noko yoini. Nãskakẽ nã chanĩmara fakĩ nõ

yoipakenaka: “Nōko Nios fāsi sharakōi,” ixō nō yoipakenaka.

*Pablo Epa Nios yōkani iskafakī: “Epa Niosi, mī Fake chanīmara faafo ato tāpimasharafe,” fani*

<sup>15-16</sup> Nāskakē nirixō ē mato nikai mā Jesús Ifo sharafata, a fetsafo feri a mato feta Nios Ifofamisfo fe mā rafesharakōiaito ē nikakī inimayanā ē nirixō ē mato Epa Nios kīfixōfafāini. Nāskakē ē iskafa fafafāini: “Epa Niosi, na Efeso anoxō mia noisharakata fetsafo feri rafesharakōiafo,” ē fai yoikī. <sup>17</sup> Niospa āfe Fakekōikī Jesucristo. Nāskax sharafinakōia. Nāskakē ē mato kīfixokī iskafamis: “Epa Niosi, mī Yōshi Sharapa na Efeso ano ikafo ato tāpimasharakōife mia xafakīakōi tāpisharakōinōfo. <sup>18</sup> Oa xini peisharaino nō fomākīa foiski nō nai xafakīakōishara nō ōitiro keskara, mī Yōshi Sharapa ato ōimafe Epa Niosi, mia tāpisharakōinōfo āto ōiti mēraxō. Askatari ato tāpimafe a nō oniyamatai mī noko shināni nono nāmāxō mī Fake Jesús nō Ifofaax nō mefe ĩpaxanō nai mēra. Askatari a nō ōimismafo mī noko ināxiai ato ōimafe. <sup>19-20</sup> Epa Niosi, mī Yōshi Sharaōxō mī afama mīshti famis. Nāskaxō mī Fake Cristo mī anā nimani mī Yōshi Sharaōxō mefe pataxamei niax mefe xanīfokōi inō. Nāskax mī pōya kayakai aōri mefe tsoa. Afia mī Yōshi Shara nō mēra nanexō a nofeta mia chanīmara faafo tii afara fetsafo mī noko ispasharakī mī noko amasharakī.” <sup>21</sup> Āfe Yōshi Sharaōxō Cristo ato mǎnǎo nīxō, nǎ nāmǎnoafo āto xanīfo tii finōkōia. Askatari nai mēranoafori āto xanīfofo Cristo ato finōkōia keyokōi. Nāskax āto xanīfo finakōia. Tsoa pishta finōtiroma. <sup>22-23</sup> Akka

Epa Niospa âfe Fake yoini keskafakĩ keyokõi mai anofoya nai mēranoafo ato ikinã. Nãskaxõ âfe Fake katonĩ nã chanĩmara faafo tii âto Ifo inõ. Nã chanĩmara faafofi âfe yorakõi keskarafoki. Cristo âto mapo keskara. Akka nõko mãpo nõ shinãtiro. Nã fistichi nã chanĩmara faifo yoitiroki, noko ikinãno afeskaxõ nõ atiomãki. Akka nõ mapomaisax nõ nitiroma. Nãskarifiã nõko Ifo Jesúsmãisax tsoa nitiroma. Keyokõi nã chanĩmara faafo nofe ikafo. Nãskax nofe rafe kakãini nã noko amapaiyai keskara nõ anõ.

## 2

### *Niospa noko noikĩ noko ifia nõ afe ãpaxanõ*

<sup>1</sup> Taeyoi mã iyopaoni oa naa keskara mãto chaka soaxma. <sup>2</sup> Nãskakẽ mã afara chakafamis, a yora chakafãfe akai keskafakĩ. Askata a nai mēra ikafãfe a niafaka chakafãfe âto xanĩfãfe Satanás mato amapaiyai keskafakĩ mã amis, Satanás ifofakĩ. <sup>3-4</sup> Nõri askafapaoni, nã nõ afara chakafapaiyaiifo keskara nõ apaoni. Afara chaka shinãmiskõifo nõ ipaoni. Epa Niospa nã nikayospamisfo ato omiskõimanaitĩa ato omiskõimakõixii. Nõri ato keskaraxõ nõ afara chakafaito nã ato akai keskafakĩ nokori omiskõimakerana. Akka nõ afara chakafafiato noko omiskõimatama. Niospa noko fãsi noisharakõimis, noko shinãkõikĩ noko omiskõimapaima. Noko chakafapaimisma. <sup>5-6</sup> Nõ Nios Ifofayoxoma nõ shinãyopaonima, chaka fistis nõ shinãyopaoni, nõ chakafayopaoni. Niospa noko noikõifiãto, nõ oniyamatai ares noko Niospa õikĩ yoini: “Na êfe Fake Jesús Ifofaifo ã ato nãmã nĩchixonĩ mã reteafono, ã otifaxõ, ato yafi ifixii

niri nai mēra afe ĩpaxanōfo,” ixō Niospa yoini ares ōikĩ afe ikaifono ato omiskōimayamaxii. Nāskakē nō nāmānoax oa nō afe nai mēra ika keskara nō nono ika nāmā. <sup>7</sup> Epa Nios xanĩfokōixō Jesús yafi noko otoani noko noikōikĩ nō afe nai mēra ĩpaxanō, nā chipo fakeaifāferi tāpinōfo Epa Niospa noko noikōiaito. <sup>8-9</sup> Nios sharafinakōia. Nō Jesús chanĩmara fakē noko ifi nō afe ĩpaxanō. Akka nōa nō ifimetiroma, Nios fistichi noko ifitiro noko noisharakōikĩ. Akka nō afarafo shara fatokai noko ifitiro nō afe ĩpaxanō. Akka fetsafo āa chanĩkani iskatirofoma: “Ē afama mĩshti famis. Nāskakē ē tanaima sharakōi Nios ano kai,” ixō yoifiax askara yorakai Nios ano katiroma āamāi chanĩ Jesús Ifofamax. <sup>10</sup> Nāskakē Epa Niospa taeyoi shināyoni Jesucristoōxō yorafetsafo nō axosharakōinō. Nāskakē aa fistichi noko onifani afara fetsafo nō sharafanō aōxō. Akka nores fisti nō afaa sharafatiroma. Cristo Jesús Ifofaxō nō afama mĩshti sharafatiro. Nāskakē taeyokĩ Epa Niospa ares ōikĩ yoini.

*Jesucristoōnoax nō ōiti sharakōiya ipanaka anā nōko ōiti chaka neenōma*

<sup>11</sup> Nāskakē shināmakiyamakāfe. Mā chanĩmara fayopaonima. Nā judeofāfe yora fetsafo ato yoikĩ iskafanifo: “Nā yora fetsafo nōko kaifoma. Akka nōfi Niospa yorafokĩ. Akka na yora fetsafokai Niospa yorafoma. A Niospa noko yoimis keskafakĩ keyokōi nōko foshki repa nō xatepakemis na nō judeofāfe. Nāskakē nō ōimani afe yorakōifoxō. Akka a yora fetsafāfe āto foshki repa xatemisfoma. Nō ato tāpitiro afokai Niospa āfe yorafoma,” ixō judeofāfe mato yoimis mā judeofokēma. <sup>12</sup> Akka

shinãkapo. Taeyoi mākai Cristo fe iyopaonima. Epa Niospa israelifo ato katonĭ keskafakĩ matorikai katoyonima mã ato fe afe yorafo ipanã. Afe yorafo yoiyoni keskafakĩ matorikai yoiyonima. Mã shinãkĩ iskafani: “Ooa. ¿Nõ afeskatiromẽ nõko chaka noko soaxonõ nõ Nios fe ipaxanõ?” ixõ mã shinãpaoni. Nãskatari nã Nios chanĩmara faafoma mẽra mã iyopaoni. Mã Nios fe rafexoma mã tãpiyopaonima. <sup>13</sup> Nãskaxõ mã Niosnoa shinãyopaonima. Nãskafiano Cristo Jesús matoõnoax naino, ãfe imi foni mã afe ipaxanõ. <sup>14</sup> Nãskakẽ Jesucristoõnoax nõ noinãtiro, ěfe kaifo israelifo fe yora fetsafo. Nãskakẽ nãskarafos noko shinãmasharatiro nõ aõnoax noinã faatanãx afianã nõ noikaspa faatanãnõma. Nãskakẽ afanã noko anã afeska fatiroma. Iskaratĩa nõ Cristoõnoax yora fisti keskarafõ. <sup>15</sup> Nãskakẽ Jesús nokoõnoax nani. A Moisés Niosxõ kenenĭ keskara anã noko tsõa yoitiro. Jesucristo keyokõĭ noko nãxoni nõ afe yorafo inõ. Nãskakẽ mãri judeofoyamafekẽ, mato yafi noko ifini. Nãskax a yora fisti keskarafõ nõ inõ. Mã nõ fetsa keskarax õitisharayakõĭfo nõ inõ noinãsharakõĭ. <sup>16</sup> Nãskakẽ Jesús ifi cruz ikakinoax noko nãxoni. Na ěfe kaifo judeofo yafi a judeofomari Jesúsxõ Niospa noko a yora fisti keskara noko fani. Noko noisharakõĭkĩ nõ nikayospafo iyopaofinikẽ, Jesús nokoõnoax nani. Nãskakẽ Niospa noko yora fetsafoya rafema sharakõĭa afe yorafo nõ inõ.

<sup>17</sup> Nãskakẽ Jesús nãmã fotoxõ noko yoini ãfe meka shara Niospa noko ifinõ. Noko judeofo akai keskafakĩri, matori ifia mã judeofoyamafekẽ mã Nios shinãyamafipaonino. Akka nõ judeofãfe

nō Nios shināyopaoni. Nāskakē iskaratīa nō anā noikaspa faatanātama nō nōināsharakōi. <sup>18</sup> Jesús noko nāxoni nōko chaka noko soaxoxiki nō Nios fe rafesharakōinō afe ipaxakī. Nāskakē Niospa āfe Yōshi Shara nokoya rafemana na nōko kaifo-mafo fe nō rafesharakōinō. Nāskax Epa Nios fe nō ĩpaxanō.

<sup>19</sup> Nāskakē iskaratīa mā anā Nios chaifaama mā afe yorakōifo. Nāskakē iskaratīa a Jesús Ifofamisfo fe a rama Jesús Ifofaifo Niospa yorakōifo. <sup>20-22</sup> Nāskax mā oa pexe sharakōi keskarafō. Oa tokiri nō pexe shara faa, afeskax paketiroma keskara. Taefakī nō mai pōkita a mēra tokiri nanexō, nō pexe fatiro pakeyamanō. Tokiri kerex sharakōiki nō atiro pexe fakī. Nāskarifiakī taefakī a Niospa mekaōnoa ato yoipaonifāfe ato yoipaonifo Niospa ato shināmanaino. Akka chipo mā Jesús nāmā fotoxō, aōxō tāpimisfo ato ifini aōxori a fetsafo tāpimanōfo, oa pexe fisti mēra nō imis keskaraxō, akairi ato tāpimanōfo Niospa meka sharaōnoa ato yoikakī, atoōxori yorafāfe chanīmara fanōfo. Askaxori a rama fakeaifāferi Jesús Ifofakanax, oa nō pexe mitsisipakōi faano, anā pake-tiroma keskarakōi inōfo Jesucristo Ifofakanax. Nāskakē nōri Ifokōi faax, nōri anā paketiroma nō keyokōichi Ifofaax. Oa pexe sharakōi mēra nō ika keskara, nō ixii, Niospa āfe Yōshi Shara nō mēra naneano.

### 3

#### *Niospa Pablo yoini a judeofoma Jesúsnoa yoinō*

<sup>1</sup> Nāskakē ē mato Epa Nios yoixononi. Ĕfi judeokī mā ēfe kaifoyamafekē ē mato noi. Mato noixō,

ẽ mato Jesucristoõnoa yoi. Nãskakẽ ea achixõ karaxa mẽra nĩchitifo. <sup>2-3</sup> Niospa ea nĩchini ẽ aõnoa ẽ mato yoinõ. Niospa keyokõi yorafo ato noi, judeofo fisti ato noima. Akka a iyopaonifãfekai tsõa tãpiyopaonima Niospa ares ato noifiaito. Nãskakẽ ẽ aõnoa ẽ mato kenexona, pishta fakĩ. <sup>4</sup> Na ẽ mato kenexona õixõ, mã tãpitiro nã ẽ tãpia keskafakĩ Cristoõnoa. Akka a nõko xinifo iyopaonifãfekai tsõa tãpipaonima. <sup>5</sup> Niospa taefakĩ tsoa tãpimayonima. Mã iskaratĩa Niospa ãfe Yõshi Sharaõxõ a aõnoa yoimisfo mã ato tãpimana. Askatari a ãfe mekaõnoa yoimisfori mã ato tãpimana. <sup>6</sup> Akka na meka sharakai tsõa Jesúsnoa tãpiyopaonima. Akka yora fetsafori Epa Niospa afe yorafo itirofo. Nãskakẽ iskaratĩa matori Niospa tãpimani, judeofoya yora fetsafo Jesúsnoax Niospa fakefo mã inõ. Nãskakẽ Epa Niospa ãfe kaifo judeofo yoiyoni keskafakĩ Jesucristoõxõ akairi fitirofo.

<sup>7</sup> Nãskakẽ a Jesús Ifofaafo ẽ ato chakafafiaito, ea noisharakĩ Epa Niospa ea nĩchini ẽ ãfe meka shara ato yoinõ ãfe Yõshi Sharaõxõ. <sup>8</sup> Ẽ fãsikõi Jesús chakafakĩ finakõipaoni, na fetsafãfe chakafakĩ finayamafiaifono. Ẽ askafafiaito, ares fisti Niospa ea noikĩ ea nĩchini aõxõ na yora fetsafo judeofoma ẽ ãfe meka shara ato yoikĩ tãpimanõ Niospa ato noisharakõiaito. Ato noikĩ ato shinãmakõipai. Nios fisti tsoa keskaramakõi. ãfe Fake Jesúsnoa keyokõi nõ tãpitiroma. <sup>9</sup> Niospa keyokõi onifaxõ, ea nĩchini ẽ ato mēstesharakõi tãpimanõ. Tsoa pishta tãpiamano ares fisti tãpini Jesús noko nãxoyoamatai ato tãpimanima. <sup>10</sup> Nãskakẽ Niospa ea nĩchini ãfe meka sharaõnoa ẽ ato yoinõ akairi Nios tãpinõfo.



Tāpikanax oa ato fe yorakōifo keskara ixikakī Jesúsnoax. Mā askaito nai mēraxō a xanīfo ti-ito askara ōikī tāpisharatirofo. “Chanīma, Niospa tāpikīfinakōia,” fatirofo. <sup>11</sup> Afaa pishta onifaatama nānori shināni: “Na ēfe Fake Cristo Jesús Ifofaifo efe yorakōifo ixikani,” ixō yoini keskara mā iskaratīa askakōia. <sup>12</sup> Jesúsmaī noko nāxonikē, nō Ifofaax, nō Nios fe rafesharatiro mesetama noko potayamanō. <sup>13</sup> Ē mato yoinō, ea nikakāfe. Ē mato yoiaito ea nikakakī ea karaxa mēra iki-matifo. Ē omiskōifiaino eōnoa shināchakayamakāfe. Ea karaxa mēra ikimanafoki ē Cristoōnoa mato yoiaino. Nāskafekē inimasharakāfe, mā Niospa yorafokī.

### *Cristo noko noi*

<sup>14</sup> Nāskakē nāfo shinākī ē ratokonō mai chachipakefofā ē Epa Nios kīfimis. <sup>15</sup> Nāmāi nai mēranoafo feta nono mai anoxō nā Ifofaafāfe āto Epakē, nāato ēfe fakefora noko famis. <sup>16</sup> Nānori ē mato Epa Nios kīfixokī iskafamis: “Epa Niosi, mī fāsi sharakōi. Maitiofo yafi nai mēranoafo mīnākōifo. Mī afama mīshti fatiro. Mī Yōshi Sharaōxō mia chanīmara faafo Efeso anoafo mī kerex shara ato ināfe. <sup>17-19</sup> Nā Jesús Ifofaafō mī Yōshi Shara atoya rafemafe. Mia tāpikī finakōinōfo. Askaxō tāpinōfo mī fāsi ato noiaito. Mī Fake Cristori fāsi ato noi. Cristo noko noiai keskara tsōa tāpitiroma. Askafikē ato tāpimafe, Epa. Akka tāpikanax, mī ato fe rafekōiaito mia keskara inōfo,” ixō ē matoōxō Epa Nios kīfifāini.

<sup>20</sup> Akka Epa Niospa afama mīshti fatiro a nō yōkai tii noko axotama finōmata noko axotiro. Nāato āfe sharaōxō noko axotiro

afama mīshtifo. Noko axopaiyai keskafaito nō tāpitiroma. Finōmainīfofāta noko shara fatiro. <sup>21</sup> Nāskakē nō Epa Nios Nios yoikī iskafatiro: “Epa Niosi, mī sharafinakōia. Mī Fake Jesucristoōxō mī noko sharafamis,” ixō mēxotaima nō yoifafāini. Keyokōichi nā chanīmara faafo feta a inōpokoaiifāferi yoisharapakenakafo. Nāskapakexapainō.

## 4

### *Niospa Yōshi Sharaōnoax oa yora fistikōi keskara nō itiro*

<sup>1</sup> Ē mato yoisharakōi. A Jesucristoōnoa ě mato yoimis. Ē ato yoiaito a Jesucristo nikakaspaiifāfe ea karaxa mēra nīchiafo. Ē mato yoisharanō, ea nikasharakōikāfe. Niospa mato katonī Jesucristo mā Ifosharakōi fanō. A ě mato yoiai keskai isharakōikāfe. <sup>2</sup> Nāskax, “Ē finakōia,” iyamakāfe, anori shinātama. Yora fetsafo noisharakāfe ato shinākī. A fētsa tāpisharamato mato afeskarafaito, shināchakatama ato noisharakāfe, ōitifishkitama, isharakōita. <sup>3</sup> Niospa Yōshi Sharaōnoax nō isharakōinō a yora fistikōiax itikini. Tanaimakōi ikāfe, ōitifishkiki faatanākakīma. <sup>4</sup> Niospa noko yoimis keskai: “Isharakōikāfe, nōko İfo ifofasharax, mā chaima anā fotoiyoi kiki,” shināi isharakāfe. A Nios İfofaafori oa nofe naneafo keskarakōifoki. Nāskax isharakāfe. Niospa āfe Yōshi Shara askarakī. <sup>5</sup> Nōko İfokōi Jesucristo. Nā fisti nō chanīmara fai Epa Nios fe İpaxakī. Nāskakē āfe Yōshi Shara nō mēra nanei. <sup>6</sup> Anā fato fetsa nōko Niosma. Nā fistikōi āfe Fake fe a chanīmara faafo tiito āto xanīfokōi. Nāskaxō keyokōi onifani. Nāskakē a

Ifofaafo āfenākōifo. Nāskaxō afara sharafo noko amai nōko shinā mēraxō afe keskararafo noko amatiro. Afe Yōshi Sharaōxō keyokōi a fichipaiyai keskara nō anō āfe shinā noko ināi.

<sup>7</sup> Nō Jesús Ifo sharafaito ōikī āfe shara noko minia fisti rasi chanīmara faifo nō ato axonō Jesús Ifofasharakōinōfo. Keyokōi āfe sharaōxō afara fetsa nā Jesús apaiyai keskara anōfo ato ināi. Nō fisti keskarafiakē nā noko imapaiyai keskara noko ima nō afara axonō. <sup>8</sup> Nāskakē Niospa meka Cristoōnoa yoikī David kirika kenekī iskafani:

Nono mai anoax Apa Nios ari kaitīa nā Ifofaafo tii āto chaka ato soaxoni afianā Satanás āto ifo inōma, askatamaroko Ifo sharakōi fanōfo. Nāskatari keyokōi nā afe yorafo ato imapaiyai keska fakī ato imani aōnoax ishara faatanānōfo, ixō keneni.

<sup>9</sup> Nāskaxō kenekī iskafani: “Nono mai anoax Cristo afianā Apa Nios ari kani,” ixō keneni. Nānori kenenino nō tāpitiro Apa Nios ari kayoamano na mai ano fotoyonino nai mēranoax noko keskara ixiki. <sup>10</sup> Niospa yoiaino, ftoni. Mā reteafono āfe Apa Niospa otoani. Nāskaxō ifini afe nai mēra ixii. Nāskakē keyokōi nai mēranoafofāfe nono nāmānoafāferi āto xanīfo ixii. <sup>11</sup> Nāato noko katoni noko imapaiyai keskai aōnoax nō shara faatanānō. Nāskaxō fetsafo afe rafemisfo ato imata, nokori nīchi aōnoa fetsafo nō ato yoisharanō. Fetsafori katoni nā meka shara aōnoa ato yoinōfo Jesús Ifofanōfo. Fetsafori katoni āfe meka shara chanīmara faifono ato tāpimayanā ato kexesharanōfo āfe meka nikasharakōinōfo. <sup>12</sup> ¿Afeskakī ato Niospa katonimē? Aōxō yoinōfo Niospa ato katoni a yora fetsafo ato yoisharanōfo,

a Jesús chanĩmara faafo aa yora fisti keskara inõfo Jesús tãpikõikanax. <sup>13</sup> Afãfe Niospa Fakeõnoa noko tãpimasharakõiaifono, aõxori fetsafori nõ ato yoikĩ tãpimasharanõ. Askax keyokõi oa yora fistikõiax itikini nõ inõ. Askaxori Jesús afe keskaramãki nõ tãpisharakõinõ. Askax oa Jesús õiti keskara sharakõi ixiki. <sup>14</sup> Nãskax anã oa fakefo keskara nõ itiroma mã nõmẽra Niospa meka yosiano. Oa nefe onori kai, anã onori kai imis keskai, fakefo askatirofo afaa shinãsharaima. Askaxõ a Niospa meka tãpisharafãfema ato yoiãifãfe nikafofãsa fatirofo. Askaxõ tãpisharaxikakĩma Niospa mekakõi. Askatari a yora ãa chanĩki fanĩrira ato yoimis nõ nikatiroma. <sup>15</sup> Fanĩrira ato yoitama nõ nõinãsharakõixõ Niospa meka mẽstesharakõi nõ ato tãpimasharakõitiro. Nõ askai nõko Ifo Jesucristo ãfe õiti keskara sharakõi nõ itiro. <sup>16</sup> Jesús nõko mapo keskaraxõ noko shinãmakĩ noko yonomanaino, oa afe yora keskara nõ itiro. Akka nõko yora meemafix nõ mifimais ita, nõ kishimais ita, nõ pachomais ita, nõ feromais ita, ixõ nõ afaa yonotiroma, afaakairoko shinãkĩ. Akka nõ mifi rafeyata, nõ tae rafeyata, nõ fero rafeyata, askai fetsexõ nõ meemasharakõixõ nõ yonosharakõitiro shinãfãi, nõko yoramãi meemasharakõikẽ. Nãskafakĩri keyokõichi nõ Jesús Ifokõi faax nofe yorafo fe nõ isharakõitiro noinãsharakõikai, Jesúsnoax mã noko ãfe Yõshi Shara inãno oa ãfe yora keskara sharax.

*Cristo nõko õiti noko fetsafaxõano a keskarakõi nõ itiro, anã nõ ipaoni keskara ixikima*

17 Jesucristo ea ĩkinã aõxõ ã mato yoinõ. Ea nikasharakõikãfe a Jesús Ifofamisfãfema fanĩrira chaka fisti yoimisfo fanĩrira shinã kakĩ. Nãskakẽ tsõa shinãsharaima. Nãskakẽ ato keskara iyamakãfe. 18 Tsõa shinãima oa fakishifã mẽra niafo keskarafo. Askatari oa feromais keskara ikafo chai õima. Nãskakẽ tsõa tãpifãi shinãmisma. A Niospa shinãi anori shinãmisfoma. Nãskakẽ tsõa Nios Ifofapaimisma. 19 Åto õiti kerexkõi. Askakaxõ afarafo chakafakani tsoa rãfitiroma. Nikayospakõimisfo, nõ finakõiara ikani nikayospakani. 20 A Jesús noiaifãfema shinãifo anori mato Jesús tãpimamisma fanĩrira chaka. 21 Jesús mato tãpimamis chanĩkĩ mato yoimisma. 22 A Nios tãpiamax mã iyopaoni anori anã shinãyamakãfe. Fanĩrira mato Satanás shinãmayopaoni mã chaka inõ. 23 Anã anori shinãtama, iskaratĩa Niospa Yõshi Sharapa mato shinãmapaiyai anori shinãkãfe a mã iyopaoni shinãmakikãta, isharakãfe. 24 Õiti fenashara fichipaikãfe. Oa nõ rapati chapokõi potaxõ nõ rapati fenasharakõi nõ safemis keskafakĩ, õiti fena sharaya ikãfe Niospa fichipaiyai keskai.

25 Nãskax nõ Cristo yorafo. Nãskakẽ anã fanĩrira chanĩ yoiyamakãfe. Afara õixõ yoikõikãfe chanĩmakõi.

26 Mã õitifishkikĩ anã afarafo chakafayamakãfe. Askata aa chai õitifishkiyamakãfe. Õitifishkipai samama raekãfe xini ikiyamano. 27 Mã õitifishkiriaito koshikõi Satanás mato chakafamarisafai. Askayamakãfe Satanás nõ mẽra ikiyamanõ.

28 Mã yometsoyopaoni anã askayamakãfe.

Iskaratĩa yonokãfe a mã fichipaiyai fixikakĩ, a yora afaamaisfo ato inãxikakĩ afara sharafo.

<sup>29</sup> Askata anã fanĩrira chaka yoiyamakãfe. Shinãsharata yoisharakãfe. Mã askaito mato nikakanax ãto õiti mẽra inimanõfo. Askatari Jesús Ifofasharanõfo. <sup>30</sup> Askata Niospa ãfe Yõshi Shara nõko õiti mẽranao omiskõimayamakãfe afara chakafakĩ. Askatamaroko nõko Ifãfe ãfe Yõshi Shara nokoõnoa inimamasharakõikãfe. ãfe Yõshi Shara nõ mẽra naneakĩ, oa koxa marakka faa keskarafakĩ Niospa noko askafaa nã Jesús anã fotoaitĩa.

<sup>31</sup> Mãto yora mẽraxõ mato õiti fishkimamis a chaka shinãmakikãfe. Ato noikaspai õitifishkikĩ finakõimis iyamakãfe. Afaa shinãima oa õitimais keskara ãakõi mekai keskara iyamakãfe. Fãsikõi yõachepemis ato ferateni iyamakãfe. Ato noikaspakĩ ato ïchayamakãfe. Mã chakara ato fayamakãfe. Mãkõi chakafakĩ ato noikaspayamakãfe.

<sup>32</sup> Askatamaroko ato fe raenã faatanãsharakõikãfe, a mato Niospa aka keskafakĩri Jesúsxõ ato rae-fakãfe.

## 5

### *Afeskax Niospa fakefo itirofomẽ*

<sup>1</sup> Mã Niospa fakefokẽ mato noisharakõi. Nãskakẽ a keskara ikãfe, Ifofasharakõi. <sup>2</sup> Cristo noko shinãkĩ finakõi nokoõnoax nani. Nõko chaka noko soaxoni. Nãskakẽ noko nãxoni, aakõi nanima. Nãskaito xafakĩa Epa Niospa õini nõko chakaõnoax nani, anã nõko chaka nokoõ neenõma. Nãskakẽ mã ranãri nõinãi finasharakõikãfe.

<sup>3</sup> Mã Niospa fakefokĩ õisharata ikãfe. Isharakãi afarafo chaka shinãtama. Mãto ãfimafo

chotayamakāfe. Kēromāri mātō fenemafo chotamayamakāfe. Askatari mares fisti afama mīshti a mā fichipaiyaifo fiyamakāfe. <sup>4</sup> Askatari fanīrira meka chaka yoiyamakāfe. Anori shinātama a Niospa fakefo isharakōikaxō, mēstekōi yoisharatirofo iskafakī: “Aicho Epa Niosi, mī noko ikisharakōiaki,” ixō mā yoimis. <sup>5</sup> Mā mā tāpimis yora fetsafāfe fanīrira shināmisfo āto āfimafo chotamisfo ato fe oxakaxō, kēromāri āto fenemafo chotamamisfo, askara yorafo Nios ano fokanima. A afarafo noikakī fichipaimisfo, askara yorafāfe afama mīshtifo noikani Nios shinātama, askara yorafo a Nios xanīfo ano fokanima.

<sup>6</sup> Ōisharakakī yora fetsafāfe anorima mato yoipaikani fanīrira āa mato pāarakakī. Askara yorafāfe Nios nikakaspakakī chakafakani. Askaito ōikī Niospa ato kopikiri chakafaxii atoki ōitifishkikī. <sup>7</sup> Nāskakē nā ikai fo keskara mā iyamakāfe. Afarafo ato feta chakafakī, anori shināyamakāfe.

<sup>8</sup> Mā fanīrira shināyopaoni mātō ōiti oa fakish keskara ikax, akka iskaratīa mā Cristo fe rafeax a mā iyopaoni keskara anā mā shināima. Mātō ōiti xafasharakōia mā ika. Nāskara shara. Mēxotaima isharakāfe. <sup>9</sup> Nāskax mā isharakōimis. Cristo mato ikināno mātō ōiti xafasharakōi mā imis. Mā isharakōiax shara mā itiro. Mātō ōiti mēraxō mēstesharakōi mā shinākōitiro. Mā anori shināxō anā fanīrira mā yoima. <sup>10</sup> A Niospa fichipaiyai keskafakī tāpisharakōikāfe. Nāskakōi fakāfe. <sup>11</sup> Nā Nios Ifofakaspamisfāfe, afaa tāpiamafāfe afarafo chakafaifāfe ōiki māri ato feta chakafayamakāfe. Ato ōitamaroko ato yoisharakōikāfe: “Anā afaa chakafayamakāfe,” ixō ato yoikāfe. <sup>12</sup> Askatari

a yora fetsafāfe one afama mīshti chakafafiakī onepaimisfo. Askarayakai nō mekaima nō yoi nō rāfitiro. <sup>13</sup> Akka mā fakishano nō rāpari otaxō, keyokōi nō ōisharakōitiro. Nāskarifiai a yorafāfe afarafo chakafakaxō onepaifiaifāfe, Niospa meka ōikī tāpitirofo a chakafamisfo. <sup>14</sup> Nāskakē Niospa yoimis iskafakī:

Afarafo mā chakafamiski moinīfofākāfe oa mā naa keskara ikax fininīfofākāfe Cristo mato ōiti mēra oa fafeai keskara mato fasharanō, ixō yoimiski.

<sup>15</sup> Nāskax isharakōikāfe. Oa Niospa meka tāpiama keskara iyamakāfe. A Niospa mekaōnoa yoikī kenenifo anori isharakōikāfe. <sup>16</sup> Nāskakē a Nios Ifofaafomafo iskaratīa chakafinakōiafo. Nāskakē māri isharakōikāfe ato keskara ikakīma. A Niospa apaiyai keskara akāfe mēxotaima.

<sup>17</sup> Nāskakē fanīrira chaka shināpaiyamakāfe a Niospa mato amapaiyai anori tāpisharakōikāfe.

<sup>18</sup> Askatari anā pāeyamakāfe. Mēxotaima pāeriai mā chakakōifo itiroki. Askaxō mā afaa shināsharaima. Askatamaroko Niospa Yōshi Shara mato mēra naneano afe rafesharakāfe mato yonomasharanō.

<sup>19</sup> Nāskakē mā ranā Niosnoa yoinōnākāfe isharakōikai. Nōko xini David mēxotaima fanāipaoni keskariai māri Nios Ifofaax aōnoax fanāikāfe mā ranā mato ōiti mēraxō nōko Ifo shināi inimayanā.

<sup>20</sup> Pena tii aichora fakāfe Epa Niospa noko afama mīshti faxōfaino, nōko Ifo Cristo shināyanā nō Ifo sharafanō.

*Afe keskara nō itiromē Cristo yorafa*

<sup>21</sup> Cristo nikasharapai, mā ranā nikanōnāsharakōikāfe.



<sup>22</sup> Kēromāri a mātō Ifo Jesús mā nikasharai keskafakī, mātō fenefo ato nikasharakōikāfe mato yoisharaifāfe, mātō Ifo Jesús mā nikai keskafakī. <sup>23</sup> Cristo nōko xanīfofinakōia nō nikasharai keskafakī, kērofāferi āto fenefo nikasharakani āto xanīfomāiyakē. Askatari Cristo noko ifimis nō nikasharakōitiro oa nō afe yorakōifo keskaraxō. <sup>24</sup> Nāskakē kēromā āfe fene nikasharatiro āfe xanīfomāiyakē a nōko Ifo Jesús chanīmara faafo tiito nikasharaifo keskafakī.

<sup>25</sup> Nō Cristo Ifofaano noko noikōiax aakōi nokoōnoax nani. Nāskarifikī feronāfakefāfe, mātō āfifō noisharakōikāfe. <sup>26</sup> Mā āfe meka chanīmara faito, oa noko fāka choka keskara faxō noko katonī, oa nō afaa chakafamisma keskara noko imaxii. <sup>27</sup> Mā noko ifiax, nāskax nokoōnoax nani nōko chaka noko soaxoxiki nō isharanō. Nā anā nōko Ifo Jesús oaitīa a chanīmara faafo tii noko ifixō sharakōi noko ōixii, oa nō afaa chakafamisma keskara noko ōixii. <sup>28</sup> A feronāfakefo āa noimesharaifo keskafakī, mātō āfifō noisharakāfe. <sup>29-30</sup> Akka shinākapo. Tsōa pishtakai ato yora chakafamisma. Nōko yora nō mesefakī fonāikī nō pimis shara nixiki. Nāskafakīri Cristo a afe yorafo ato kexesharamis māmāi nō afe yorakōifokē. <sup>31</sup> A Niospa meka yoimisto kenenī iskafakī: “Nāskakē feronāfāke kēro fiax anā apa fe afa ikano anā ano itiroma. Paxkatiro, āfi fe ixiki. Askax oa fisti keskara ixiki anā rafema,” ixō yoikī kenenī. <sup>32</sup> A Niospa meka yoimisto kenenī anori taefakī tsōa tāpinima. Mā iskaratīa noko Niospa tāpimasharai a nōko Ifo Cristo Ifofafo tii afe yorafokanax, oa fisti keskara afe yorafo ixō kenenī. <sup>33</sup> Ē mato yoi fisti rasichi

māto āfiffo noisharakōikāfe. Mēxotaima aa mā mā noimeai keskafakī māto āfiffo noisharakāfe. Askatari kērofāferi āto fenefo noisharakōikaxō nikasharakōinōfo.

## 6

<sup>1</sup> Fakefāfe, māto epa nikasharakōikāfe māto efa yafi, nōko Ifo Jesús noikī. Nāskara sharakōi. <sup>2-3</sup> Epa Niospa Moisés shināmanaino kirika keneni iskafakī askara nō nikanō: “Māto epa yafi māto efa noisharakōiyanā ato nikasharakōikāfe. Mā askafakī nono mai anoxō xinia ranā mā aki in- imayanā,” ixō Niospa shināmaino Moisés kirika keneni.

<sup>4</sup> Iskaratīa āto apafari ē yoisharai. Māto fakefo ferateyamakāfe matoki ōitifishkiyamanōfo. Ato askafatamaroko a nōko Ifāfe noko noiai keskafakī, māto fakefo tāpimasharakōikāfe. Fenāmāshta ato yoisharakōikāfe akairi Jesús tāpisharakōinōfo.

<sup>5</sup> Askatari ato yonoxomisfāferi māto xanīfo tii ato nikasharakōikāfe, nono mai anoxō mato yonomanai fāfe māto xanīfo tiito. Nāskakē mato yoiāifāfe ato nikasharakōikāfe, nā nōko Ifo Jesús fichipaiyai keskafakī mā samama ato axorisa fai. Askatari māto xanīfāfe mato yonomanaito mā axosharatiro. Nāskakē, “Ē Cristoōxō yonosharai,” ixō nō yonosharatiro. Nāskarifikī ēfe xanīfori ē yonosharaxotiro.

<sup>6</sup> Māto xanīfāfe mato ōiainos yonoxosharakakima, mato ōiayamafiainori yonosharaxokāfe inimakōiyanā. Mā askaito ōi inimanō. Mā māto xanīfo yonosharaxokī, nā nōko Ifo Cristo yonoxona keskara mā faikai. Akka nono mai anoxō māto xanīfo mā inimama keskafakī, nōko Ifo Niospa mato amapaiyai keskara mā

axikai. Nāskax nōko Ifo Jesús āfe yonomati ixikakī. <sup>7</sup> Inimasharakī yonosharaxokāfe. A mā nōko Ifo yonosharaxonai keskafakī mātō xanīfori yonosharaxōkāfe inimayanā. <sup>8</sup> Mā mā tāpia yorafāfe yonosharaifāfe ōikī, Cristo afara sharakōifo ato ināxii, a xanīfomais ināta a xanīfoyari ināxii.

<sup>9</sup> Nāskakē mā xanīfofofāferi, a mato yonoxomisfo ato shara fakāfe. Nō mato chakafaira ixō ato ferateki koshapaiyamakāfe. Shinākāfe, māri Ifoyakī a nai mēra ika. Nōko Ifo Cristo keyokōi nāskarafos noko ōi kiki.

*Afeska nā nō chanīmara faafo tii nō mitsisipasharakōi itiromē fetsafāfe noko afara chakafamapaiyaifono nō afaa afeska fanōma*

<sup>10</sup> Ē mato yoisharanō, ea nikasharakōikāfe, efe yora mīshtichi. Nōko Ifo Niosnoax nō mitsisipakōi itiro āfe Yōshi Shara no mēra nanano. <sup>11</sup> Ē afara fetsaōnoa mato yoinō mā tāpinō. Sorarofo āto xanīfāfe ato yoitiro itipinīsharanōfo fetsafāfe ato afeska fanōfoma. Nāskaxō a aō xorakomeaifo kerexkōi ato inātiro, maiti kerexkōiri ato inātiro, sītora kerexkōiri ato inātiro fetsafāfe ato retenōfoma. Nāskarifiakī Epa Niospa āfe Yōshi Shara mato ināpaiyaito fikāfe, Satanás chakata mato afara chakafamapaiyai keskara axikakīma. <sup>12</sup> Akka nōkai yorakōifo fe mēenāima. Askatamaroko nā niafaka yōshi chakafo fe nō iki, kerexkai noko afara chakafamapaiyaifono. Nāfāfe nō ōiamafiaino noko afara chakafamapaikani. Nā niafaka yōshi chakafo ichapakōifo. <sup>13</sup> Nāskakē Epa Niospa āfe kerex shara mato ināpaiyaito

fikāfe aōnoax mitsisipakōi ixikakī, niafaka yōshi chakafo matoki nokoxō, mato afeska fanōfoma. Nāskaxō nā niafaka yōshi chakafāfe mato afara chakafamapaiyaito Niospa kerex sharaōxō mā finōtiro mato afaa chakafamanōfoma. Akka Niospa nā mato amapaiyai keskara mā akōinax mā isharakōitiro, niafaka chakafo mato makinoa potax. Nāskax Jesús fe rafexō mā afaa chakafaima.

<sup>14</sup> Ē mato yoiai keskai sorarofō itipinī sharatirofo keskai. Māri itipinī sharakāfe niafaka yōshi chakafo matoki nokoxō mato afara chakafamapaiyaifo keskara axikakīma. Epa Niospa mato amapaiyai keskara fisti akāfe isharaxikakī. Sorarofāfe ĩkisi āto sītora kerexkōi itipinī fatirofo ayaxō āto rapati safexikakī. Nāskarifiāi mā isharakōiaino niafaka yōshi chakata mato afeska fatiroma. Askatari sorarofō āto safeti kerexkōichinī xorakometirofo, nā ato noikaspaifāfe āto ōitiki ato pīanōfoma. Māri Niosnoax isharakōikāfe, nikafaka yōshi chakafāfe mātō ōiti mēraxō mato afaa chakafamanōfoma.

<sup>15</sup> Oa sorarofāfe āto sapato shara safekanax ichotirofo keskariai, māri nāskari akāfe. Nāskarifiāi mā ato Niospa meka yoisharaikai mā katiro a Niospa meka nikamisfoma mēra. Itipinī sharakāfe fetsafoki nokoxō Niospa meka sharaōnoa mā ato yoiaito nikai inimakōinōfo.

<sup>16</sup> Akka sorarofāfe āto xītimati nā kerexkōi tsoatirofo a ato noikaspaifāfe ato pīanōfoma. Nāskarifiāki a mato xītixonai mā fenai. Mā nōko Ifo Jesús chanīmara faino nā niafaka chakafāfe mato afara chakafamapaiyaito mā atiroma. Nāskakē nō Jesús chanīmara fakōinaino nā nōko xītimati keskara itiro.

<sup>17</sup> Sorarofāfe āto maiti kerexkōi safekaxō

ãto mapo kexesharatirofo, a ato noikaspaifãfe ato mapoki afeskafanõfoma. Nãskarifiakĩ mã Jesús chanĩmara fakõinax mã Epa Nios fe nipaxatiro. Mã askaito niafaka chakata mato afeska fatiroma. Sorarofãfe ãto keno fitirofo a ato noikaspaifo fe aõ ato fe retenãxikaki. Nãskarifiakĩ Niospa Yõshi Shara oa keno keskaraki fikãfe. Nã keno keskaraki Niospa meka shara nã mã fichipaikõi niafaka yõshi chaka matoki nokopaiyaito otimafaxikakĩ. <sup>18</sup> Shinãmakiyamakãfe. Mẽxotaima kifikãfe Niospa ãfe Yõshi Sharaõxõ mato tãpimasharai. Shinãmakixoma mato shinãkõi. Nãskakẽ shinãchakayamakãfe. Mẽxotaima ato Nios kifixokãfe a Ifofaafõ ato axosharanõ. <sup>19</sup> Nãskaxõ eari kifixokãfe Niospa Yõshi Sharaõxõ ãfe meka shara mesetama ã ato yoinõ. Nã ãfe kaifomafoõnoaxri Jesús ato nãxoni ã yoinõ tsõa tãpiyonifoma. <sup>20</sup> Ea Niospa nĩchini anori ã ato yoinõ ãfe meka shara. Nãskakẽ ea karaxa mẽra ikimanifo. Nãskakẽ ea kifixokãfe ã Niosxõ ato yoinõ mesetama.

*Pablo mã mekai xatekĩ Efeso anoafõ meka shara fomani*

<sup>21</sup> Nofe yora Tíquico ã aõ noisharakõi. Efeta nõko Ifo Jesús yonoxomiskẽ. Ë Tíquico mato ari nĩchixii, ã afe keskara ikamãkĩ mato tãpimanõ. <sup>22</sup> Nãskakẽ ã a mato ano nĩchikai nõ afe keskaramãki a Tíquico mato tãpimanõ. Nãskakẽ mãto õitinĩ shinãsharai mã inimanõ mã mã tãpiax.

<sup>23</sup> Nõko Epa Nios feta nõko Ifo Jesucristo mãto õiti mẽra mato shinãsharamanõ mã fekaxteyamanõ. Jesús chanĩmara faax, keyokõi mã nõinãi fetsenõ.

<sup>24</sup> Nã nõko Ifo Jesucristo noipakenakafo Nios

sharakõi mato noikõipakenaka. Askapakexapainõ.  
Nã tii.  
Ëkã Pablo ã mato kenexoni.

**Niospa meka fena Jesucristo<sup>noa</sup>**  
**New Testament in Yaminahua (PE:yaa:Yaminahua)**

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

**Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

---

PDF generated using Haiola and XeLaTeX on 22 Feb 2024 from source files  
dated 29 Jan 2022

6c7b7ce2-9d87-5405-91e6-71ce1387adcc